

CHRISTOPHORI SONNLEITHNER

J. C.

# DISSERTATIO ANTI-FEBRONIANA


DE  
INFALLIBILI  
ECCLESIAE DISPERSAE  
CONSENSU. |



VIENNAE,  
APUD RUDOLPHUM GRAEFFER 1775.

I. ad Timoth. III. .15

— Scias, quomodo oporteat te in Domo  
Dei conversari, quæ est *ecclesia Dei*  
*vivi, columna & firmamentum veritatis.*



## MONITUM AD LECTOREM.

**V**ix Justinii Febronii liber singularis de Statu ecclesiæ publicam lucem adspexit, illico ex omnibus mundi plagis scripta adversus eum proruperunt. Cum vero ii, quos Febronius ad versarios nactus est, homines essent principiis ultramontanis innutriti, & falsi de statu ecclesiæ monarchico systematis tenacissimi, hinc

4                      ❖ ❖ ❖

factum est, ut in eas tantum Febronii doctrinas calamus strinxerint, quæ prætenso ecclesiæ statui monarchico & reliquis ultramontanorum opinionibus bellum indicebant. Ast prout mihi cum his quisquiliis, quas ferior ætas produxit, & veneranda antiquitas ignoravit, res non est, quin potius mihi hac in re cum Febronio omnibusque illis, qui formam ecclesiæ non ex quorundam præconceptis opinionibus, sed ex genuinis Evangelii & apostolicæ traditionis fontibus æstimant, facile convenit, ita me quoque hujus eruditi viri auctoritas non adeo excæcavit, ut reliquis ejus doctrinis absque discrimine adstipularer.



larer. Id fane a me hactenus impetrare non potui, ut ecclesiæ per orbem dispersæ utut super dogmate morumve regula consentienti infallibilitatem, prout ille, abjudicarem, hocque peculiare hujus sacræ civitatis donum solis conciliis œcumenicis vendicarem. Est quidem hæc quæstio nullo adhuc ecclesiæ canone definita, adeoque eruditorum hac de re libera disputatio, verumtamen non est una ex iis, quæ sanæ doctrinæ & charitati nullum penitus præjudicium inferunt, quin potius ab infallibilitate ecclesiæ dispersæ ipsam integritatem veritatis evangelicæ multa ex parte dependere mihi penitus est persuasum.



Hunc ergo laborem , quo  
ecclesiam disperfam ab erroris pe-  
riculo contra Justinum Febronium  
vindico , B. L. æqui bonique con-  
sule , & si quid vel argumentorum  
gravitati vel stili elegantia deesse  
adverteris , conatum saltem ad-  
proba.

Vale.





# DISSERTATIO ANTI - FEBRONIANA

DE  
INFALLIBILI ECCLESIAE  
DISPERSAE CONSENSU.

§. I.

**Q**uamvis ecclesiae catholicae cum reliquis hominum societatibus rectoriis in eo conveniat, quod Deum ter optimum maximum auctorem habeat; \* in eo tamen praepriis ab om-

A 4 nibus

\* Non est enim potestas teste apostolo Paulo ad Roman. XIII. v. 1. nisi a Deo & Regibus data

nibus aliis distincta est, quod in iis, quæ ad finem illius necessaria sunt, a benignissimo suo conditore infallibilitatis dono prædita sit.

## §. II.

Hanc ecclesiæ infallibilitatem non tantum sacra scriptura \*) verum etiam ipsa naturalis ratio \*\*) adeo clare docent, & tam Theologi quam Jurisconsulti nostri tanta cum perspicuitate jam demonstrarunt, ut Homerum post Iliada canerem, si huic themati a scopo meo ceteroquin alieno diutius insisterem.

## §. III.

*ta est a Domino potestas & virtus ab Altissimo Sapient. Cap. VI. vers. 4.*

\*) Mathæi XVIII. v. 17. & XXVIII. v. ult. Joan. XIV, v. 16. 25. & 26. ibidem XVI. v. 13 Act. Apost. XV. vers. 28. Paul. I. ad Timoth. Cap. II. vers. 15.

\*\*) Omnes hominum in homines potestates excepta sola ea, quæ ecclesiæ Christi in fideles competit, transitorijs rebus occupantur, quæ, etiamsi in se boni quid contineant, tand tamen non sunt, ut homo eis ad obtinendum finem sibi a suo creatore præfixum  
&



## §. III.

Scio quidem hæreticos dogma hoc exinde potissimum impetere, ac si inter nos Catholicos de subiecto infallibilitatis nondum satis constaret, dum alii,

A 5

ut

& a benignissimo servatore restitutum indiget. Quemadmodum ergo homo ad ultimum creationis & redemptionis suæ finem pertingere potest, etsi bona hujus sæculi spem ejus omnem fallant, ita quoque necessarium non est, ut potestas, qualiscunque demum illa sit, quæ hujuscemodi bona procurat, ab erroris periculo immunis existat. Demus enim ex legibus, quas parens, herus, paterf. aut imperans subditis suis fert, eam, quæ sperabatur, non redundare utilitatem: demus bellum, fœdus, pacem intentum non attingere finem: demus commercia & votis non succedere, quid quæso! amittunt subditi? nil nisi bona transitoria, bona, quæ insuper habere, floccique facere facile queunt, dummodo animarum suarum detrimentum non patiantur (Marci VIII. vers. 36). Ast bonum illud, ad quod nos ecclesia a Christo Domino instituta perducit, tam sublime tam necessarium hominī est, ut, si illo excidat, miserrimæ sane & adeo deplorandæ conditionis sit, ut ipso salvatore teste melius foret, si nunquam natus fuisset (Marc. XIV. vers. 31). Quemadmodum ergo Deus, si infallibilitatis donum reliquis hominum imperiis concessisset, in superfluis abundasset, ita, si illud ecclesiæ suæ denegasset, in necessariis defecisse jure merito argui posset.

ut ajunt, summo Pontifici, alii conciliis tantum peculiare hoc donum vendicant, \*) sed dum hæc contra nos effutunt, summam aut ignorantiam, aut impudentiam produnt. Certus enim, & a nemine catholicæ communionis in dubium revocatus est canon, Episcopos in concilio œcumenico legitime congregatos universam ecclesiam repræsentare, ideoque in decidendis fidei morumque quæstionibus infallibiles esse. \*\*)

## §. IV.

Hæc duo duntaxat in utramque etiamnum partem disputantur: I. an summus Pontifex solus ex cathedra definiens, II. an ecclesia dispersa super quadam fidei, morumve regula absque ulla congregatione consentiens, æque  
ca

\*) Ita ratiocinatur Just. Henning. Böhmerus in dissert. de jure circa libert. conscient. Tomo II. Jur. eccles. Potest. præfixa §. 10.

\*\*) qui id ex S. Scriptura, perpetua ecclesiæ traditione & Testimoniis S. S. Patrum demonstratum videre vult, consulat eos, qui de conciliis, eorumque auctoritate data opera scripsere.

ac consilia œcumenica, erroris periculo careat? Sed hæ quæstiones eruditorum altercationibus relictæ, neque dogmati prius stabilito officiunt, neque certitudinem nostræ fidei nutare faciunt. \*)

### §. V.

Ex his ergo, quæ hætenus dicta sunt, quivis facile cognoscat, me, dum infallibilitatem ecclesiæ dispersæ super fidei vel morum regula consentientis præfenti dissertatione adstruere conor, non de dogmate fidei catholicæ, sed de quæstione inter nostrates adhucdum controversa disputare.

### §. VI.

- \*) Sive enim S. Pontificis extra concilium definientis, aut ecclesiæ per orbem dispersæ infallibilitatem neges, sive affirmes, parum refert, est enim & remanet semper adhuc illud ex omnium Catholicorum ore irrefragabile iudicium concilii œcumenici, cuius possibilitatem, etsi quidam rerum divinarum minus æqui æstimatores ex rationibus politicis hodiædum in dubium vocare velint, ab eo tamen exigente necessitate semper tuto sperari potest, qui se ecclesiæ suæ usque ad consummationem sæculi adstiturum fore multoties promisit.

## §. VI.

Sunt quidem ii, qui infallibilitatem ecclesiæ dispersæ in dubium vocant, pauci \*) numeroque illis, qui eandem asserunt, longe inferiores. \*\*) Ast cum veritatem opinionum, neque ex numero, neque ex auctoritate Doctorum, sed ex rationum ab utraque parte allatarum pondere metiri oporteat, non inanem operam me impensurum esse existimo, si doctrinam, etsi a paucis tantum impugnata denuo elucidandam in me suscipio; præsertim cum

\*) Ipse Febronius præter Gersonium de potest. ecclesiæ, confid. IV. & Almanium de auth. eccles. nullum alium causæ suæ patronum adducit, nec alium forsan invenit.

\*\*) Præter Perillust. de Riegger Inst. Jur. eccles. P. I. Cap. 5. Reverendissimum a Rautenstrauch Inst. Jur. eccles. Cap. III. §. 95. & 96. Clarissim. Schrodt Inst. Jur. eccles. tit. II. §. 102. Celeber. Muratorium de Moder. ingen. in Relig. negot. Lib. I. Cap. 11. & 14. & Clariss. Claudium Fleurii in dissert. XII. in hist. eccles. pag. mihi 648 editionis germanicæ viennensis de ao 1771. reliquorum loco nominasse sufficiat Illust. Meldenium Episcopum Jacob. Benig. Bossuet in defens. Declar. Cler. gallic. Lib. IX. & X. edit. Amstelod. Tom. II.

cum eam etiam a suis patronis, non semper ex suis, intimisque rationibus propugnatam esse videam.

### §. VII.

Inter paucos illos, qui opinioni contrariæ favent, eminet Just. Febronius, qui in lib. singul. de stat. eccles. Cap. VI. §. 8. & 9. extraconciliari omnium, vel saltem plurimorum Episcoporum consensui magnam quidem venerationem deberi asserit, *ast irrefragabilem & talem, quæ pro formando articulo fidei desideratur, certitudinem* neutiquam tribuit, hancque suam thesim in subnexis scholiis per longam argumentorum farraginem probare contendit.

### §. VIII.

Ut igitur in convellenda hac Febronii opinione & adstruenda ecclesiæ dispersæ infallibilitate recto ordine procedam, I. casum seu statum quæstionis ob oculos ponam, II. argumenta meæ sententiæ ex S. Scriptura, traditione, ciliis

conciliis, S. S. Patribus, & recta ratione deprompta, exponam, & demum III. ea, quæ Febronius in contrarium affert, sub incudem revocabo.

## §. IX.

Casus controversiæ, de qua agimus sequens esto: exoritur in quodam christiani orbis angulo hæresis, hanc Episcopus, cujus gregem vexat, prævia disquisitione quidem condemnat, sed malum non tantum non sopitur, sed latius in dies serpit. Episcopi finitimi vel singuli, vel in synodos provinciales coeuntes hæresin æque atro calculo notant, res demum ad summum Pastorem deferunt, hic suam sententiam reliquis per orbem Episcopis exponit. Omnes vel saltem tot numero Episcopi summi Pastoris sententiæ accedunt, *ut non multi ex adverso stent.* \*) Quæritur in hoc casu, an consensus hujusmodi Episcoporum

\*) Sunt verba ipsius Febronii cit. Cap. VI. §. 8, ubi casum præsentis quæstionis proponit.

porum per orbem disperforum æque infallibilis fit, ac fi in concilio quodam œcumenico congregati ſententiam ſuam declaraffent.

### §. X.

Si textum Mathæi Cap. XXVIII. vers. ult. paulo penitius intuemur, & circumſtantias, in quibus divinum hoc oraculum ex ore ſalvatoris noſtri prodiit, æquo animo penſitamus, dubitare vix poſſumus, Chriſtum Dominum Apoſtoliſ ſuis, eorumque ſucceſſoribus non tunc ſolummodo, ubi congregati fuerint; verum etiam diſperſis, & per orbem quaſi diſjectis adſiſtentiam ſuam & mediante ea, infallibilitatis donum promiſſiſſe.

### §. XI.

Erat enim tunc tempus, quo benigniſſimus redemptor poſt glorioſam ſuam reſurrectionem Apoſtoliſ ſuis munus annuntiandi per univerſum orbem evangelium injunxit, eosque, ut hac legatione

tione apud omnes gentes rite fungerentur, plenissima, quam ipse a coelesti suo patre obtinuit, potestate instruxit. Erat inquam tunc tempus, quo Jesus Christus Apostolos, qui hucusque lateri suo adstabant, & tam mortem, quam resurrectionem ejus intuebantur, se a se invicem separare, universum orbem peragraré, regnumque gratiæ omnibus gentibus annuntiare jussit\*, & dum hæc jubet, iis simul adfistentiam suam omnibus diebus pollicetur. \*\*) Quis jam ponderatis hisce circumstantiis affirmare audebit, Christum Dominum Apostolis suis congregandis solummodo infallibilitatem tunc promississe, cum de nulla re minus quam de congregatione, quin potius de dispersione eorum per universum orbem sermo esset?

## §, XII.

\*) Dixit enim: *Data est mihi omnis potestas in celo & in terra, euntes ergo docete omnes gentes, baptizantes eos in nomine Patris, & Filii, & Spiritus Sancti, docentes eos servare omnia, quaecunque mandavi vobis.*

\*\*) Statim enim subjunxit: & ecce ego vobiscum sum omnibus diebus usque ad consummationem sæculi.



## §. XII.

Et qua fronte demum adfistentiam illam, quam divinus Servator Apostolis suis, eorumque successoribus *omnibus diebus* adeoque sine ulla temporis usurpatione conceptis adeo verbis pollicitus est conciliis tantummodo vendicare possumus, quæ singulis diebus, annis aut Sæculis non congregantur, quin imo durantibus per tria sæcula imperatorum ethnicorum persecutionibus ne congregari quidem potuere. \*)

## §. XIII.

Modo non absimili Christus Dominus Joann. XVI, dum Apostolis suis horam, *qua dispergatur unusquisque* advenisse pronuntiat, simul quoque *Spiritum S. docturum eos, omnem veritatem* promittit. \*)

B

## §. XIV.

\*) Conf. Reverendiss. a Rauttenst. auch loc. cit. §. 95. in Nota, & Perill. ce Riegger loc. cit. §. 346. in Nota

\*) ex quo iterum clare patet Christum Apostolis suis, eorumque successoribus Spiritus S. adfisten-

## §. XIV.

Verumquidem est, neque eo inficias, concilia esse media promptiora ad eruendum ecclesiæ catholicæ super controversiis fidei sensum, ideoque ea, ubi haberi possunt, exigentibus rerum circumstantiis celebranda esse, & tam ab Apostolis, quam ab eorum successoribus semper laudabiliter esse celebrata, verum exinde neutiquam sequitur, ecclesiam dispersam, ubi de ejus consensu constat\*), minus quam concilia infallibilitatis dono præditam esse.

## §. XV.

adistentiam non modo, ubi in nomine ejus congregati fuerint, verum etiam tunc quam maxime spondisse, ubi per omnes gentes dispersi exstiterint.

- \*) quomodo de consensu ecclesiæ dispersæ primis sæculis constiterit, & quomodo hodiernum de eo facile constare queat, docet Reverendissimus a Rauttenstrauch cit. loco §. 96, cujus verba huc adscribi merentur. *Olim quidem ait, quemadmodum ecclesiæ catholica unitas & Episcoporum per orbem terrarum in fidei capitibus consensio epistolarum communicationum commercio sustentabatur, ita constare etiam de consensu ecclesiarum per facile poterat. At dum hodie usus earum intercidit, ad libros symbolicos confugiendum. Quodsi enim Synodi nationales, provinciales, diocesane, quarum omnium*

## §. XV.

Quid etenim per physicam Episcoporum congregationem virtuti spiritus S. accedat, hætenus penetrare non potui. Nam etsi ultro concedam, in conciliis plerumque fieri *magnam disquisitionem*, \*) veritatem per rationes hinc inde adductas summopere dilucidari, argumenta adversariorum ad trutinam S. Scripturæ, & S. S. Patrum diligentissime exigi, & ut uno verbo omnia complectar, causas fidei morumque controversas penitus forsitan, quam ab aliquibus Episcopis sedi suæ immorantibus expendi, meminisse tamen oportet, infallibilitatem ecclesiæ, adeoque etiam conciliorum eam repræsentantium non ab eruditione, non ab adfistentia, & disquisitione Episcoporum, sed solum ab adfistentia invisibili Spiritus S. falli ac fallere nescii dependere.

B 2

## §. XVI

*mnium magnus est numerus, nec non cathecismi publici, ac ritualia conspiciunt, de unanimi ecclesiæ consensu nullus relinquitur dubitandi locus.*

\*) Qualis facta fuit in Concil. Hierosol. super controversia legalium observatione celebrato Actor. XV. vers. 7.

## §. XVI.

Invenimus sane Actor. XI. conventum super quæstione maximi momenti celebratum \*), in quo nulla penitus *disquisitio* facta est, sed solus S. Petrus visionem sibi a Deo immissam narravit, qua narratione finita omnes *tacuerunt* \*\*) & *glorificaverunt Deum dicentes: ergo & gentibus Deus dedit penitentiam ad vitam.*

## §. XVII.

\*) An nimirum evangelium solis judæis, an vero etiam gentilibus sit annuntiandum? a qua quæstione salus æterna tot millium hominum dependebat.

\*\*) Afferat nunc Febronius, ejusve affectuæ vel unam tantum rationem, quæ huic decisioni conciliari majorem quam extraconciliari ecclesiæ consensui fidem conciliare possit. Certe nullam ex omnibus iis, quas in suo opere adduxit, & nos § præcedenti indicavimus, inveniet. Ponamus enim S. Petrum visionem illam, quam pro confirmatione suæ sententiæ de prædicando etiam gentilibus evangelio adduxit, fratribus suis hac de re dubitantibus scripsisse, an ne minorem forsan scribenti, quam cominus narranti adhibuissent fidem? an ne *taciturnitas* absentium minus roboris quam præsentium habuisset? certe nullam adstruere possumus rationem; cur unum alterumve affirmemus. Habet sane ecclesia Dei hoc peculiare, quod teste S. Augustino Epist. 55 ea, quæ contra fidem vel bonam vitam sunt, neque approbet,

## §. XVII.

His igitur rationibus innixum concilium Tridentinum Sess. V. in decreto de peccat. originali, Sess. XIII. Cap. I. & Sess. XIV. Cap. I. ubi gravissimas fidei controversias dirimit, non solum ad sacras scripturas, Sanctorum Patrum, & probatissimorum conciliorum testimonia, verum etiam ad ipsius ecclesiæ *consensum* & iudicium tanquam ad fontem suarum decisionum provocat.

## §. XVIII.

Et si historiam ecclesiasticam consulimus, & vel sola Pelagianæ hæresis fata consideramus, nullum plane dubium superesse potest, ecclesiam disper-

B 3

fam

bet, neque *taceat*, neque *faciat*, idque sine dubio ex illa perpetua, quam huic ecclesiæ suæ Christus promisit, adistentia profuit. Si ergo primus pastor quamdam fidei morumve doctrinam reliquis Episcopis proponit, iique eam vel sola taciturnitate approbant, qua fronte hoc silentium Pastorum erroris periculo obnoxium esse affirmare possumus, quod teste Augustino vel abrumpi, vel si id non fiat, pro certa veritatis regula haberi debet.

sam eadem, qua concilia œcumenica sine dubio gaudent, infallibilitate pol-  
lere. Scimus hanc hæresin tempore S.  
Augustini nullo plenario concilio con-  
demnatam fuisse. Hoc tamen non ob-  
stante idem S. Doctor lib. I. contra Ju-  
lian. Cap. 2. & Serm. II. de verb. Apost.  
Pelagii fautoribus ad iudicium œcume-  
nicæ Synodi provocantibus *causam jam  
finitam* esse opposuit, nulla alia ductus  
ratione, quam quod doctrinam Pele-  
gianæ contrariam *Romana cum ceteris  
perseveranter teneat ecclesia* \*).

## §. XIX.

\* ) Exoriente & latius in dies serpente Pela-  
gii hæresi, plura in Africa fuere celebrata  
concilia ( quæ videri possunt apud Petr. An-  
natum Tom. II. opp. Lib. V. Art. 6. ) eo-  
rumque acta ad Innocent. I. sum. Pontificem  
transmissa, qui dum ea probavit, suamque  
desuper sententiam ecclesiæ exposuit, dum  
demum hæc eandem cum Romana perseve-  
rans tenuit doctrinam, S. Augustinus *cau-  
sam jam finitam* esse contendit, quod certe  
Pelagianis nullo plenario concilio adhuc  
demonstratis oggerere non potuisset, si vel ipse  
vel alii tunc temporis sola concilia œcume-  
nica pro ultimo dirimendarum fidei contro-  
versiarum iudice agnovissent. De causa S.  
Cypriani, in qua Febronius S. Augustinum  
contrariæ opinioni favisse autumat, intra di-  
cendi locus erit, ubi ejus argumenta explo-  
dam.

## §. XIX.

Nec etiam in ipsis conciliis, quæ universa ecclesia tanquam œcumenica veneratur, eam, quam Febronius tantopere urget, physicam Episcoporum unionem invenimus. Concilium Constantinopolitanum I. ex solis orientalibus congregatum erat, & eo tamen non obstante, ab omnibus pro œcumenico habetur ideo solum, quia Episcopi occidentales iis, quæ de fide orientales definiverant, vel in concilio a Pontif. Damaso Romæ celebrato \*) vel ut alii volunt \*\*) consensu suo extraconciliari accesserunt.

## §. XX.

Si autem Episcopi in duobus conciliis & loco & tempore diversis congregati

\*) Uti opinatur Annatus in Adparat. ad Theolog. Posit. Tom. II. Lib. V. Sect. 3. Art. 3<sup>a</sup> & van Espen Tom. opp. III. in dissert. in Synod. œcum Constantinop. I. §. XIII.

\*\*) Fleurli hist. Eccles. lib. XVIII §. 1. & Muratorius in annal. Ital. ad ann. cccLXXXI.

gregati vel Synodo cuidam particulari assensum suum præbentes unam eandemque Christi ecclesiam repræsentant, eorumque decisiones infallibilitatis dono absque dubio præditæ sunt, cur non idem de iis affirmare queamus, si extra omnem penitus congregationem dogma aliquod acceptant, rationem nullam sufficientem video \*).

### §. XXI.

Et unde quæso! nobis constat, hoc vel illud concilium œcumenicum legitimum quoque fuisse, nisi ex consensu ecclesiæ dispersæ? habuit eodem tempore; quo concilium Ephesinum Præsidente S. Cyrillo celebrabatur, Joannes

\*) Certe concilium tam Constantinopolit. quam Romanum, si quod desuper celebratum fuit, in se erant particularia. si ergo hæc concilia in se particularia propter solum consensum infallibilia tuere, etiam Episcopi per orbem dispersi inter se tamen consentientes infallibiles esse debent, quia concilia particularia in se spectata non magis quam singuli Episcopi, ab erroris periculo immunia sunt.



nes Antiochenus conventum plurium Episcoporum in eadem urbe Ephesina. Utrumque concilium causam fidei definiēbat, sed dispari prorsus ratione. Hoc enim Nestorii doctrinam orthodoxam esse pronunciavit, illud vero Nestorium ejusque Blasphemias anathemate perculit; hoc S. Cyrillum, Illud vero Joannem Antiochenum deposuit \*) unde ergo scimus illud legitimum concilium, hoc vero conciliabulum fuisse? ex nulla certe alia quam hac ratione, quia ecclesia catholica per orbem universum dispersa illud pro legitimo & vere œcumenico habuit, hoc vero tanquam conciliabulum reprobavit.

## §. XXII.

Pseudo-Concilio Trullano seu quini-  
sexto intererant plures quam ducenti  
Episcopi cum legatis Sergii S. Pontifi-

B 5 cis

\*) Historiam utriusque hujus concilii late deduxit, Fleurii in Hist. Eccles. Lib. XXV. §. 45 & seq.

cis \*), Synodo Ephesinæ II. præter Julium Puteolanum S. Leonis Papæ legatum, tres Patriarchas, & plures Exarchas & Metropolitanos adfuere Episcopi centum & triginta \*\*), & hoc tamen non obstante neque unum neque alterum conciliis æcumenicis adnumeratur ex nulla iterum alia ratione, quam quia neutrum ab ecclesia saltem quoad omnia receptum & adprobatum est \*\*\*).

## §. XXIII.

\*) Vid. Fleurii hist. Eccles. Lib. XL. §. 49. & Van Espen dissert. in Synod. quinisextam sive Trullan. §. un. Tom. opp. III.

\*\*) Fleurii hist. Eccles. lib. XXVII. §. 38.

\*\*\*] Subscriptioni enim synodi quinisextæ, quamquam disciplinaria tantum definivisset, adeo masculè se opposuit Sergius I. S. Pontifex, ut periculo carceris se libentius exponeret, quam Canones hujus Pseudo Synodi reciperet. Fleurii hist. eccles. lib. XL. §. 54. A reliquis occidentalibus hos canones æque parum receptos esse eo minus dubitandum est, quo certius ex eorundem lectione constat, plures eorum disciplinæ ecclesiæ occidentalis e diametro contrariari vid. hi canones apud cit. Fleurii lib. cit. a §. 50. usque 54. & quamvis alii, uti Van Espen dissert. cit. ex Anastasio Bibliothecario & Can. I. concilii œcum. VII. probare conentur, aliquos saltem Canones hujus Synodi

## §. XXIII.

Si ergo, uti ex allatis exemplis patet, invenimus concilia, ut ut in se tantummodo particularia ab ecclesia tamen pro œcumenicis haberi, si ex adverso consideramus plura concilia in se quidem generalia ab ecclesia tamen vel pro parte vel in totum repudiari, quid aliud exinde concludamus, necesse est, nisi ecclesiam dispersam esse judicem ultimum, qui quemadmodum de conciliis ipsis generalibus, ita quoque de veritate doctrinæ ab iisdem definitæ infallibiliter judicare potest & debet,

## §. XXVI.

nodī postmodum ab ecclesia occidentis esse receptos, hoc ipsum tamen satis probat receptioni universæ ecclesiæ id solum tribuendum esse ut Synodus aliqua generalis veri, legitimi & œcumenici concilii vires nanciscatur. Decisionibus quoque Pseudo concilii Ephesini viriliter obstitit S. Leo Pontifex tam in concilio cum occidentalibus Romæ celebrato, quam in plurimis Epistolis desuper scriptis: vid. Fleurii cit. Lib. XXVII. §. 43.

## §. XXIV.

Sunt enim concilia ut ut œcumenica & legitima non ipsa ecclesia universalis, quæ teste Apostolo est *columna & firmamentum veritatis*, sed eam tantummodo repræsentant. \*) Si ergo ecclesia est infallibilis, si concilia œcumenica ipsa non sunt ecclesia, si ergo concilia œcumenica ideo tantum infallibilia sunt, quia ecclesiam repræsentant, quid aliud nisi id exinde sequitur, infallibilitatem a Servatore promissam ultimatum in ipsa ecclesia dispersa residere \*\*).

## §. XXV.

\*) Sunt verba Synodi constantiensis in Præfat. Conf. Perill. de Riegger Inst. Jurisp. eccles. Cap. 4. §. 320.

\*\*) Hinc P. Annatus in adparatu ad Theol. Tom. II. Sect. I. Art. I. circa finem adposite ait plura esse generalia, & universalia ecclesiæ concilia, quæ tamen œcumenica dicet nemo, *ad hoc enim, ut sit œcumenicum seu generale legitimum requiritur inter alia, ut sit in ecclesia pro œcumenico receptum. Cui consonat Reverendiss. a Rauttenstrauch Inst. Jur. eccles. Cap. IV. §. 89. in Nota, ubi*

ubi ait, in universum quænam legitima aut Pseudo - Concilia sint. æstimandum esse ex adprobatione summi Pontificis nec non ex *acceptatione ecclesiæ universalis*. Recte igitur concilii Nicæni II. Patres Act. VI. Pseudo Synodum Constantinop. contra imagines congregatam ea ex ratione rejecerunt, *quod huius Synodi foras non in omnem terram more Apostolorum exiit, quemadmodum sex sanctarum & universalium Synodorum*, quibus nil aliud Patres insinuare voluerunt, quam hanc Synodum ideo non esse œcumenicam & legitimam, quia ab ecclesiâ universali ita recepta non est, quemadmodum reliquæ sex sanctæ & universales Synodi receptæ erant. Nec quis forte metuat, hoc modo infallibilitatem conciliorum œcumenicorum labefactari, eamque, dum ecclesiæ dispersæ iudicium super illa adjudicatur, tacite his abjudicari. Res plana est, & sua tam conciliis, quam ecclesiæ inconcussa manet infallibilitas, dummodo naturam utriusque oculo a præjudiciis vacuo intueamur. Ecclesia semper est & manet legitima atque œcumenica, hinc etiam ejus infallibilitas est absoluta, & a nulla conditione dependens. Ast concilia generalia hypothetice tantum tunc nempe infallibilia sunt, quando ecclesiam universalem vere repræsentant, quod autem non fit, nisi summi Pontifices & Episcopi nulla vi, nullo metu, nullis illecebris, nulla factione studio partium corrupti traditionem ecclesiarum, quas repræsentant, fortiter tueantur, neque ab eis volentes, prudentesque recedant, eamque illa sinceritate, qua par est, & fide & diligentia ex divinis libris, & ex probatis traditionis ecclesiasticæ monumentis hauriant, uti Muratorius de Mod. ingen. in Relig. negat. lib. I. Cap. 14. ait,

ait, si ergo hæ leges conditionesque in conciliis generalibus observantur, nemo est, qui de eorum infallibilitate dubitet, ast cum non omnibus facultas & occasio adsit examinandi, an prædictæ leges revera in conciliis observatæ sint nec ne, vel ex hoc solo quivis concludere poterit ecclesiam dispersam esse, ultimum idque infallibile conciliorum Criterium. Ut paucis omnia complectar: sunt concilia œcumenica infallibilia. Cum autem hæc infallibilitas a certis legibus & conditionibus mox antea recensitis dependeat, ecclesiæ dispersæ est judicare, utrum hæ leges & conditiones vere adimpletæ fuerint, quemadmodum eas in omnibus iis conciliis, quæ tanquam œcumenica veneratur, observatas, in concilio Ariminensi; Mediolanensi, Ephesino II. & in aliis pluribus Pseudo Synodis neglectas fuisse hætenus sincera fide semper judicavit. Conf. Muratorius loc. cit. & Illustriss. Bossuet in defens. Declar. Cleri gallic. lit. X. Cap. 31. ubi ait: *quoniam in conciliis non statim ac semper æque perspecta est nominis christiani representatio, quin interdum dubitari contingat, an aliquod concilium vere generale sit, tum ecclesiæ consensu rem confici Romanorum quoque Pontificum auctoritate ostendimus.*

---

## §. XXV.

Demonstrata jam satis, ut opinor, ecclesiæ dispersæ infallibilitate, videamus nunc, quid argumentis a Febronio allatis ponderis insit.

## §. XXVI.

I. Promissionem illam a Christo Domino Apostolis factam: *ego vobiscum sum usque ad consummationem sæculi*, universæ tantum ecclesiæ factam esse ex S. Augustino probat. Ego S. Augustino ultro adstipulor, quin tamen Febronio consentiam. Singulos enim Episcopos sibi ipsis relictos (prout loquitur concil. Senonense a Febronio ibi adductum) falli posse, omni dubio caret, ast inde neutiquam sequitur omnes etiam quamvis non congregatos inter se se tamen consentientes simili erroris periculo obnoxios esse, quin imo (§. X. XI. & XII.) jam satis superque ostendi textum a Febronio hic citatum  
salvis

salvis interpretationis sanæ regulis de conciliis plane intelligi non posse \*).

## §. XXVII.

\*] In eo potissimum & hic, & in aliis locis halucinatur Febronius, quod textus & sententias Patrum de universa Ecclesia loquentes, ad concilia universalia semper restringat, ac si ecclesia nullibi nisi in conciliis existeret, cum tamen jam superius [§ XXIII.] a me demonstratum sit, concilia non esse ipsam ecclesiam, sed eam tantummodo *representare*. Non deprimo uti jam supra [§. XXIII. \*\*] latius ostendi, per ea, quæ hucusque dixi, auctoritatem conciliorum, eorumve infallibilitatem. Absit hoc longe a me: id tantummodo exinde evinco, infallibilitatem a Christo promissam non in concilio *qua tali* [ut Scholasticorum verbis loquar] sed in ipsa ecclesia dispersa reside-  
re, adeoque eam esse subiectum proprium & ultimum hujus peculiaris doni, quin imo, si dicendum, quod res est, ii, qui infallibilitatem ecclesiæ dispersæ abnegant, ipsam conciliorum œcumenicorum auctoritatem ludibrio exponunt, cum enim experientia convicti inficias ire nequeant, Patres in conciliis congregatos quandoque officio suo deesse, & leges conditionesque, a quibus eorum infallibilitas dependet, negligere posse, qua, quæso ratione & se & alios convincent, hoc vel illud concilium esse legitimum & vere œcumenicum, si judicium ecclesiæ dispersæ spernant, aut saltem ejus infallibilitatem in dubium revocent.



II. Ait sinceram antiquitatem mox dictum promissum Salvatoris non aliter quam de conciliis intellexisse, & hæc per octo Sæcula pro sola & ultima *norma* finiendarum de fide controversiarum habita esse. Sed si vel unicam Pelagianæ hæresis historiam considerasset, procul dubio ab hoc argumento abstinisset. \*)

### §. XXVIII.

III. Longa verborum phalange demonstrare nititur in congregationibus res melius perpendi, ipsas etiam oppositiones & disputationes, quæ ab hujusmodi conventibus abesse non solent, dare ansam penitiori rerum discussioni, ex qua amplior causæ dilucidatio resultat; etiam in aliis Societatibus nul-

C

lam

\*) Qua fronte enim S. Augustinus causam Pelagianorum *finitam* jam esse asserere potuisset, si ille, & cum eo ecclesia catholica plenarium tantum concilium [quod in causa Pelegii nondum celebratum erat, & Pelegii fautores urgebant] pro sola & *ultima* finiendarum de fide controversiarum *norma* & iudicio habuisset.

lam pro vero & legali iudicio agnoscei sententiam nisi eam, quæ a *congregatis* Senatoribus concepta & lata est. Hæc & his similia, quæ Febronius tam ex proprio cerebro, quam ex concil. Constantinop. II. depromit, nil aliud comprobant, quam sensum & consensum ecclesiæ super controversiis fidei exortis longe expeditius mediantibus conciliis generalibus haberi posse, id quod nemo negat, & ego supra (§. XIV.) ultro concessi. Sed hæc allata a Febronio argumenta nunquam evincent, Christum Dominum ecclesiæ suæ per orbem dispersæ minus quam congregatis Episcopis eam repræsentantibus assistere, ne in errorem labatur. Jam enim (§. XV.) monui, infallibilitatem hujus sacræ civitatis non ab eruditione, non a disquisitione, vel ut uno verbo dicam, non ab humanis Episcoporum viribus, sed solum ab invisibili Spiritus S. adfistentia dependere, quo præsupposito ea, quæ ab humanarum societatum similitudine deduci forsan possunt argumenta sua sponte corruunt.

## §. XXIX.

IV. Ea, quæ præcedenti §vo allata sunt, Febronius auctoritate Gersonii & Allmaini, quos solos in patrocinium suæ opinionis adducit, fulcire contendit, quorum primus ecclesiæ dispersæ auctoritatem definiendi controversias fidei solum *materialiter* seu *potentialiter* attribuit, secundus vero plane abjudicat. Ast quemadmodum me auctoritas Allmaini contra tot argumentorum a me adductorum pondera ne tantillum movet, ita ex Gersone Doctore aliquin famigeratissimo libenter sciscitari vellem, unde is de adfidentia Servatoris *materiali* & *potentiali*, -quam stante sua hypothese de ecclesiæ dispersæ potentiali & materiali infallibilitate necessario admittere vel potius fingere debet, edoctus sit. Ego sane in omnibus, qui hanc peculiarem ecclesiæ doctrem evincunt, S. Scripturæ textibus nullam materialem aut potentialem, sed tantummodo actualem, quæ *omnibus diebus* præsto sit, infallibilitatem promissam esse invenio.

## §. XXX.

V. Varias ratiunculas subnectit, quibus stabilitam a se opinionem adhuc magis fulcire vult. I. Non fatis constare de promissa a Christo ecclesiæ dispersæ infallibilitate II. Sanam rationem omnibus persuadere viam conciliarem ad detegendam determinandamque veritatem multo esse aptiorem, quam dispersum quommodolibet diligens examen. III. Singularia multorum decreta non posse coalescere in unum, ut universalis ecclesiæ formet decisum. IV. Suæ sententiæ suffragari usum & disciplinam ecclesiæ. Non agi hic de argumentis humana ratione aptis ad indagandam veritatem, sed de *deciso ultimo* & ex institutione Christi infallibili. Ad singula respondebo, & quidem ad I. ajo, præter textum Act. XV. v. 28. & Mathæi XVIII. v. 20. nullum in S. Litteris occurrere, qui de congregatione Apostolorum expresse loquatur, adeoque de singulis absque congregatione inter se consentientibus non æque ac de congregatis intelligi posset, quin

imo

ino supra ( §. X. XI. & XII. ) jam ostendi, textum Mathæi XXVIII. v. ult. & Joan. XVI. ad concilia plane adplicari non posse. Ad II. non nego viam conciliarem esse plerumque aptiorem ad eruendum catholicæ ecclesiæ sensum, sed inde non sequitur, eam esse quoque unicam. Ad III. id, quod tam perfrecte negat Febronius, ex ipsis rerum argumentis jam ( §. XVIII. ) exemplo Synodi Constantinopolitanæ I. ostendi, quæ tantum moraliter una & œcumenica est, re ipsa autem ex duobus conciliis & tempore & loco distinctis constat. Ad IV. ea, quæ ( §. XVII. ) pro infallibili ecclesiæ dispersæ auctoritate ex historia pelagianæ hæresis deduxi, satis superque demonstrant pro mea non minus quam Febronii Sententia usum & observantiam ecclesiæ stare, & si S. Augustino lib. IV. contra duos Epist. Pelag. Cap. ult. fides adhibenda est, quam ei adhibendam esse, nec Febronius, nec ullus alius negabit, plures longe hæreses per ecclesiæ dispersæ judicium, quam per concilia generalia confixæ sunt. Inte-

rim concilia, ubi haberi possunt, esse remedia expeditissima dirimendarum fidei controversiarum, in eo me Febronius æque ad V. facile consentientem habet. Id unum satis mirari nequeo, quod scriptor alioquin eruditissimus hic id ipsum, quod in quæstione vertitur, pro fundamento suæ opinionis adducere non vereatur, & sui quasi immemor argumenta, quæ antea pro excludente conciliorum infallibilitate ex humanæ sapientiæ scriniis depromsit, hic proprio iterum gladio jugulet.

## §. XXXI.

VI. In scholiis §. 8vo subnexus sibi met ipsi objicit, ecclesiam docentem æque ac definientem esse infallibilem, idque auctoritate concilii Trid. Sess. IV. corroboret. Sed mirum, quanta facilitate is nodum hunc gordium solvat, vel potius dissecet. Ait enim ecclesiam *docentem*, non ex solis Episcopis, uti *definiens*, sed ex pluribus aliis doctoribus consistere, adeoque consensum ecclesiæ docentis non ex sola Episcoporum

rum super dogmate quodam concordi sententia, sed exinde demum resultare, si universum fidelium corpus extraconciliari Episcoporum sententiæ adquiescat, ex qua communi adquiescentia dein universalem ecclesiæ observantiam oriri putat, quam & hic & in aliis locis æque ac conciliorum definitiones erroris expertem esse ultro, fatetur. Sed nodum in scirpo quærit Febronius. Sunt sane in ecclesia præter Episcopos plures adhuc Pastores, qui munus docendi obeunt. Inter Patres speciali Doctorum ecclesiæ nomine insignitos non paucos numeramus, qui uti bene advertit Febronius, Episcopi nunquam fuerunt. Id tamen non diffitebitur eruditus non ster adversarius, inter Episcopos & reliquos, qui doctorum munere funguntur, id præcipue intercedere discriminis, quod illi ad munus docendi & pascendi ab ipso Christo Domino immediate vocati & instituti, hi vero tantum ab Episcopis in partem sollicitudinis adsciti sint, ex quo sua sponte fluit solos Episcopos esse nativos ecclesiæ doctores, adeoque etiam suborto quodam de fide

aut moribus dubio judices. In quo, uti mihi quidem videtur, sola quoque & unica ratio consistit, cur in conciliis œcumenicis nemo nisi Episcopi ex institutione Christi jure suffragii decisivi gaudeant. Nec distinctio a Febronio schol. 13. excogitata, qua Episcopos quidem in conciliis *judices* esse admittit, extra concilia autem solum *custodes & testes* sanæ doctrinæ esse contendit, nobis negotium faceffit, hæc enim distinctio, quam potius superfluum compellare possumus, & toti antiquitati & ipsi Febronio contradicit, qui Cap. IV. §. 2. & Cap. V. §. 1. schol. 5. totus in eo est, ut argumentis invictis demonstret Episcopos etiam singulos esse primos controversiarum fidei judices, quod etiam Cap. VI. §. 6. schol. 7. lectoribus suis denuo sollicitè inculcat. Si ergo Episcopi & ii quidem soli tam in conciliis, quam extra illa doctores sunt ea prærogativa a Christo Domino instructi, & a reliquo Doctorum sive pastorum Choro distincti, ut decretorium de causis fidei judicium ferre queant, consequens quoque est, ecclesiam docentem, quate-



quatenus de ambiguis doctrinæ capitibus explanandis sermo est, uti in conciliis, ita etiam extra ea ex solis Episcopis constare, adeoque in eo sensu ecclesiam docentem a definiente nullatenus differre. Et sane, si omnes vel plurimi orbis Episcopi in eandem doctrinam conspirant, adeo, ut ex adversa parte pauci tantum stent, non video, quid illi *universali ecclesiæ observantiæ* delit, quam ipse Febronius cum Vincentio Lirinenfi infallibilem esse ultro fatetur. \*) An ne forsan & adquietiam *laicorum* prætendit, prout schol. 6. non obscure indigitat, & exemplo Lutheranae & Calvinistarum sectæ corroborare contendit? sed dicat mihi Febronius, undenam & quando universalis ejusmodi adquietientia speranda sit? oportet, juxta effatum Apostoli *esse hæreses*, & erunt quoque in ecclesia Christi semper hæreses eæque non novæ tan-

C 5

tum,

\*) Hinc non immerito a Perillust. de Riegger Inst. Jur. eccles. P. I. Sect. II. Cap. I. §. 221. in Not. *fluctuantis & sibi non adeo constantis hac in re doctrinæ jure merito infimulatur*

tum, sed etiam veteres, usque dum fiat unus Pastor unumque ovile. Existunt adhucdum Ariani, Nestoriani & Hussitæ, existunt adhucdum Lutherani & Calvinistæ, quamvis eorum errores non solum iudicio ecclesiæ dispersæ, verum etiam a conciliis œcumenicis jam dudum confixi fuerint, vel ergo ipsis etiam conciliis generalibus infallibilitatem abneget Febronius, vel prætensam illam adquiescentiam universi corporis ecclesiæ dimittat necesse est.

### §. XXXII.

VII. Obstantem sibi magnopere S. Augustini auctoritatem causam Pelagianorum sine concilio generali finitam esse pronuntiantis ex ipsis S. Doctoris verbis in suas partes trahere conatur, dum ille lib. IV. contra duas Epist. Pelag. Cap. ult. asserit, perniciem hujus hæresis tam *apertam fuisse, ut concilii congregatione opus non esset*, ex quo infert non iudicium ecclesiæ dispersæ hanc hæresin cum Innocent. S. Pontifice condemnantis S. Augustinum permovisse, ut causam

causam Pelagianorum finitam esse assereret, sed apertam ejus perniciem sive falsitatem. Ast quæro ego, undenam constabat huic S. Doctori apertam adeo esse perniciem doctrinæ Pelagianæ, quæ non aliquot hominum obscurorum tantummodo animos occæcaverat, sed orientem pariter ac occidentem Carthaginem non minus quam Romam turbaverat? undenam, inquam S. Augustino de hoc constabat? an ne forsitan tantam suæ doctrinæ habuit fiduciam, ut quod ipsi non probaretur, statim apertam & omni conciliari disquisitione penitus indignam hæresin esse pronuntiare auderet? sane hoc cum summa hujus sancti & eruditissimi viri modestia componi nequit. Sed undenam ergo, urgebit Febronius, S. Augustino constabat tam apertam esse perniciem Pelagianæ hæresis? audiat id ex ipso S. Augustino, qui lib. I. contra Julianum Cap. II. laqueis Pelagianis sententiam Innocentii I. S. Pontificis opponit, *quam Apostolica & Romana cum ceteris tenet perseveranter ecclesia.* Hic igitur consensus ecclesiæ dispersæ, hoc rescriptum summi Pastoris

ris a reliquis orbis Episcopis summa veneratione receptum S. nostrum Doctorem adeo convicit, ut Pelagii doctrinam apertam perniciem & nulla ulteriori concilii generalis discussione dignam esse pronuntiaret, quin imo in ferm. II. de verb. Apost. *causam* jam *finitam* esse declararet. Nec sibi forsan blandiatur Febronius, consensui Episcoporum per orbem disperforum universalem illam, quam supra ad observantiam ecclesiasticam requirebat, adquietiam accessisse, hoc enim non contigisse, sed pestem pelagianam adhuc longo posthac tempore per orbem grassatam esse; & historia ecclesiastica, & ipse S. Augustinus testatur, qui dum loco mox citato causam Pelagii jam finitam esse pronuntiat, simul quoque, ut *hic error aliquando finiatur*, enixis votis exoptat.

## §. XXXIII.

VIII. Demum omnem § 9<sup>mo</sup> movet lapidem, ut ex causa S. Cypriani ejusque cum Stephano S. Pontifice de rebapti-

rebaptizandis hæreticis controversia opinionis suæ argumentum eliciat, quod in eo potissimum consistit, S. Cyprianum, etsi S. Pontifex cum plurimis orbis Episcopis pro valore baptismi ab hæreticis collati staret, tamen neque a S. Augustino, neque ab aliis viris probis pro hæretico habitum fuisse solummodo ea ex ratione, quia illo tempore *veritas eliquata nondum per plenarium concilium solidata erat*, uti ipse S. Augustinus lib. II. de baptismo Cap. IV. fateatur. Sed si remota omni præconcepta opinione historiam hujus controversiæ consideramus, & omnes, quæ circumstabant res, paulo accuratius pensitamus statim adparebit, consensum illum ecclesiæ dispersæ, cujus ab errore immunitatem hætenus vendicavimus, tunc temporis non adfuisse; quamquam enim Stephanus S. Pontifex plures longe quam S. Cyprianus Episcopos sibi consentientes haberet, insignis tamen quoque numerus Episcoporum teste S. Augustino lib. II. contra Gaudent. Cap. 8. ex parte S. Cypriani stabat, qui infirmitatem baptismi ab hæreticis collati non

non figillatim tantum, verum etiam in pluribus, plurium locorum conciliis \*) strenue assererent, & argumenta non quidem vera adeo tamen verisimilia adstruebant, ut ipse S. Augustinus loco mox cit. *tale aliquid* quod Stephanus jussit, *asserere non auderet, nisi ecclesiae catholicae concordissima auctoritate firmatus fuisset.* Non ergo adeo concors tunc adhuc erat Episcoporum per orbem dispersorum super validitate baptismi ab hæreticis collati sententia, *ut pauci tantum ex adverso steterint*, quin potius S. Cypriani cum 80 & pluribus Episcopis tam doctrina quam pietate conspicuis, & demum tot conciliorum desuper celebratorum dissensus quæstionem hanc adeo ambiguitatis nebulis adhuc involvebat, ut veritas non nisi per plenarium concilium *solidari* potuerit. \*\*)

## §. XXXIV.

\*) Quæ videri possunt apud Patrem Annatum in adparat. Lib. 5. Sect. 4. Art. 3. Tom. 2. opp.

\*\*) Confer. Claudii Fleurii cit. dissert. XII. in hist. ecclesiast. pag. 648. & 649. ubi inter causam Pelagii & S. Cypriani eandem differentiam adstruit, atque exinde colligit, in illa congregationem concilii generalis super vacaneam, in hac vero necessariam fuisse.

## §. XXXIV.

Reliquas, quas adhuc hinc inde Febronius spargit ratiunculas, refellere animus mihi ideo non est, quia cum iis, quas hactenus jam refellebam, re ipsa coincidunt. Cæterum quemadmodum Febronius suam, ita & ego meam scriptitationem iudicio ecclesiæ catholice lubens volensque subjicio.

F I N I S.



